



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

Iran-i US nem yimjung atema taginüba onük 14 agütsü

East Bengal coach Oscar Bruzon-i club toktsütsü



VOL. XXIII ISSUE NO. 200 (ADOK 200) DIMAPUR TENTONÜ (MONDAY) MONUPII (MAY) 04, 2026

₹ 5.00

Union Minister Shekhawat-i Moatsü nung aden Tanü Koridang Assembly by-election votes azünger



Dimapur, May 3, 2026 (TYO): Longpayimsen yimtsüng nung Moatsü cum Mini Hornbill Festival anogo tanabuba nung Union Minister, Culture and Tourism Government of India, Gajendra Singh Shekhawat aden.

"Moatsü benjung ya benjungbentsü ka dang masü saka taküm libaliroa aruba sayuba ka lir. Iba benjung ajanga pelar, lokti akangshiteper aser lipoküm den putepa aoer" ta Minister Shekhawat-i ashi.

"Iba benjung ajanga Indian tesayubatem sayur, kong terenlok ya langka ka yangluteba dang masü saka tesentaktep, yimyatsüya aser lokti putepa aliba lir ta ashir. Linük tejakleni aotsüba ya infrastructure dang masü saka yimya, sobaliba aser nübortem külem tangatetba nung ajemdaka lir" ta paisa ashi.

"India linük tashiji temeyoktep lir ta asüba ya Nagaland ajanga tatishitsü agütsür. Asenoki alima ainba den sobaliba putepa ayutsüla kechiyong maitsü medeni alima ainbaji

tamendakdak mali. Technology aser sobaliba külemi aotsüla. Moatsü benjung ajanga telongjem aser tatok agütsüba osang sangoktsür, aser külemi longiemer benjungtepba lokti kaji teti tashi itta alitsü" ta paisa ashi.

"Sobaliba ya terenlok atema tashitait hadir ka lir aser Tourism ya sobaliba nung tera yanga lir aser iba ajanga temelenshi bener arutet. Hornbill Festival ya global Tourism map nung denogo aser ibala Mini Hornbill festival ajanga Tourism ajanga local nisungtem den sendakteper" ta Union Minister Shekhawat-isa metetdaksü.

Centre sorkari ajak asoshi Tourism ajungkettsü tenangzükba lir aser state tem nem special assistance agütsütsü. Iba alizüng nung Northeast region aser talisa Nagaland ya kanga tongtipang lir ta paisa ashi.

Union Minister Shekhawat-isa sobaliba aser inyaksangshi ya külem tebilemtsü khuret lir aser ajaki bentshitsüla, kumzuka ayutsüla aser benjungtsüla ta ashi.

NH-29 Aggrieved Landowners senden amen

Dimapur, May 3, 2026 (TYO): Purana Bazaar nungi Chümoukedima tashi National Highway-29 nung ali kiburtem May 2, 2026 nü senden ka menogo.

Hotel Saramati Conference Hall nung amenba senden nung land survey process mapang metokmeperi inyaksembatem indang jembi.

Iba maparen nung assessment aser classification nung tim masüba inyak aser iba ajanga ali kibur teimbaka indang compensation claims magizüker ta senden nung jembi.

Parnokisa survey records nung meputep aliba aser evaluation process nung tashishitsü aketba indang onüktem benoka lemsatetp.

Ali kiburtemi onük balala asoshi inyaka aotsü atema telok

ka tentettsü lemtet. Parnokisa sorkar aser bangdak ketdangpurtem dang ali kiburtem indang khuretem asoshi inyaksü aser lemtet tajung ka agitsü atema ashitsü bangjemtep.

NH-29 Aggrieved Landowners tenüng nung shimtetba telok nung K. Samuel-i Coordinator, Kheto R. Zhimomi-i Press & Media Secretary, aser Ms. Chubakumla Ao-i Assistant Press & Record Secretary ama inyaksü shimteta liasü.

Maneni, ajak adentsü aser tajungba inyaksangshia aotsü asoshi Mutsitso Kezo (Chakhesang), T. Sepipa (Sangtam), Khrietuo Yoshu (Angami), Sashi Longchar (Ao) aser Tonizhe Yeptho (Sümi) nung tribe representatives ama shimtetogo.

Kohima, May 3, 2026 (TYO): Hombarnü Mokochung district kübok Koridang Assembly constituency nung by-election indang votes azüngtsü aser iba atema security maparen akangshiogo.

Mokokchung District Deputy Commissioner office ajanga Central Armed Police Forces (CAPF) den state security personnel mapa lemozükja lir, multi-layered security arrangements agiogo, CCTV surveillance aser strict access control measures tenzükogo.

Hombarnep 8:00 ako nungi Koridang Assembly Constituency by-election indang votes azüngtsü asoshi maparen ajak renemogo ta election ketdangsürtemi ashi.

Koridang Assembly constituency nungi BJP MLA asür Imkong L. Imchen mapang tatsüka temang mejungi aruba sülen November 11, 2024 nü Guwahati nung asü. Iba ajanga April 9, 2026 nü by-election

agitsüsa aküm.

Koridang constituency by-election nung vote enoktsür 82.21% liasü aser parnoki polling stations 30 nung votes enokja liasü.

Koridang constituency by-election nung candidate ajak agi parnok 6 lir.

Nagaland nung People's Democratic Alliance (PDA) nung adenba BJP ajanga asür Imkong L. Imchen'er jabaso Daochier I. Imchen consensus candidate ama shima liasü.

Candidate tem rongnug National People's Party (NPP) nungi I. Abenjang aser Congress nungi Chalukumba Ao na dena lir.

Maneni, Independent candidate asem- Imchatoba Imchen, Imtiwapang Kichu, aser Major Toshikaba (Retd) nungeri iba by-election nung tokteper.

Counting centre nung counting personnel, observers, aser candidate tem indang agents asoshi designated tables dena

maparen ajak renemogo ta election ketdangsürtemi ashi.

Asüng counting maparen ajunga jungjunga repringtsü asoshi CCTV cameras enoka lir ta parnokisa ashi.

April 5 aser 6 anogotem election dak sendakba mepetmesü adokdang nisung ka asü, aika yiru aser garitem raksatsü aser iba jagi counting centre aser temeket nung multi-tier security arrangement agiogo ta ketdangsürtemi metetdaksü.

Election Commission-i tetuyuba agütsüba ama Electronic Voting Machines (EVMs) ya strong rooms nung yua lir aser Hombarnep counting metenzükdang candidate tem mesüra parnok indang agents tsüngdang ang lapoktsü.

Asüng counting asütsüpurtem training anaben tashi agiogo aser tashishitsü malitsü aser Election Commission tetuyuba ama inyaksü asoshi teinyaksü ajak inyakogo ta ketdangsürtemi ashi.

Manipur nung kin o kin rara tenzükür küm 3 abensaogo

Imphal, May 3, 2026 (Agencies): Manipur nung kin o kin tsüngda mepetmesü adoker küm asem ajungba tenüng nung Coordinating Committee on Manipur Integrity (COCOMI)-i Imphal nung sentong ka ayonga agiogo.

Iba lokti sentong ya "Three Years of Manipur Crisis" omen nung ajemdaker agi aser nisung temeyoktep adenshia shilem agi.

Mapang talangka tebilemtsü khuret mebantetba asoshi olemteptsü aser public bangzüngtem renemtsü nükjidong nung iba sentong ayongzük ta COCOMI-i ashi.

"Manipur nung mangatettep ya India sorkari meteta dang liaka manener. Manipur sorkari Centre dang tebilemtsü khuretem tejangja meshitetet" ta COCOMI co-convenor Shanta Nahakpam-i ashi.

Manipur sorkari ajak külemi renloksü aser yimjung maparen ajungkettsü atema maparen aika tenzükogo saka item nükjidongtem matong aser tangatettep kati marur ta Nahakpam-i ashi.

Manipur nung security maparen yimjung atema ta ser inyaker, ajisüaka highways nung free movement aser internally displaced persons meyipa yoktsüba mapatem mekoktetet ta paisa ashi.

Külen, Kuki Inpi Manipur

(KIM)-i May 3 nü "Separation Day" ta ser mungogo aser iba anogo nung Union Territory takhangba nenshiogo.

May 3, 2023 nü mepetmesü adokba sülen Kuki nungeri tebang agi meshitetba timtem ajurua arur, bendanga amshir aser state sorkari ozüng tsütsü bendanga amshir ta KIM-i ashi.

Tawa Okthokhang Baite apuba dena Kuki nunger anema mapa inyaker aser iba ya bendanga amshiba inyakim lir. Ibalanya inyakim ajanga temulung melemtep tuluba akümer aser ozüng alema inyakertem odang yutsür ta KIM-isa metetdaksü.

Kuki-Zo nunger meyrjang aika timtemer, pei talidak toktsürm oa lir aser taküm liyonga aotsü mapa akoksaogo. Mapang talangka iba tebilemtsü khuret mekoktetba ajanga Kuki nunger timtemer ta KIM-isa ashi.

India sorkari tatalokbatem ajitetsüla aser ajak asoshi kasa latet ka bener arutsü asoshi inyaksüla. Onoki administrative arrangement balaka akhanger ta parnokisa nenshiogo.

KIM-isa Kuki-Zo nunger tsüngda longjema alitsü aser mepetmesü nung tepsetertem bilemteta ajaki temeten asoshi inyaksü ayongzükogo.

Maneni, Kuki Organisation for Human Rights Trust (KOHUR)-ia tanga sangdong ka nung ketdangpurtem aitsüogo.

Manipur nung kin o kin tsüngda mepetmesü adoker küm asem jungaka India nung jenjang dalangtibaji Kuki-Zo takümtet lir ta parnoki ashi.

May 2023 nung atalokbatem asoshi Supreme Court-i repringa bushisüngdanga asütsüla. Taoba Chief Minister N. Biren Singh-i aniba sorkari kin samatsütsü atema tasa atonga inyak aser iba ya parnoki telungpur teloktem den yaritepa inyak ta KOHUR-i ashi.

Nisung tepsetba, tashiyim inyakba aser mi senoktsüba kulitem bendena liaka ken o tulu aika nung nisungtem pua maru aser ken o benoka mangadanger, iba ya ozüng maliba tensa ka lir ta KOHUR-isa metetdaksü.

Iba mepetmesü nung BJP MLA Vungzagin Valte amak aser iba ajanga MLA tem dak-a tenük yokba sayur ta parnokisa ashi.

Manipur nung state armouries nungi prangpong-injang meyrjang aika auya aser iba sülen Kuki-Zo yimtsüngtem amakba ajanga state sorkar sasep nung tasa atonga inyakba mesüra odang yutsüba sayur ta KOHUR-isa metetdaksü.

Supreme Court-i mapang züngzükür bushisüngdang asütsüla, ozüng alema inyakertem aputsüla aser ken o benoka angadangsüla aser forensic o digital evidence yimjak nung sayutsüla ta KOHUR-isa takhangba agütsüogo.

Bengaluru nung Aortem Moatsü benjongmung amung



Bengaluru nung Aortem Moatsü benjongmung amungba mapang tangokba noksa angur.

Bengaluru, Monupii/May 03 (TYO): Bengaluru nung May 2, 2026 nü Aortem Moatsü benjongmung tebour junga aser telongjem nung City Revival Center, Hennur Bande nung amung.

Iba benjongmung ya Ao Senso Telongjem Bangalore (ASTB)-i "Asen Teradong Benjongtepdı aser Nükmen Razükdi" nükmen nung ajemdaker ayongba lir. Iba ya telongjem, tasen melenshiba aser lokti renloktsü asoshi ayongzük.

Iba sentong nung tongti tesemdanger, Rev. Dr. Along Jamir, Director, BSI liasü, shıbai tanü alima putu renloka melenshia aodang asenoki asen sobaliba jangjayak mesamadaktsütsü koma tongtipang, iba indang jembia liasü.

Ano maneni iba sentong nung yar tsüngsangba aser ken balala atenba liasü, koba ajanga asen Aor sobaliba takar indang saya. Iba den külemi ano lokti chiyungtepba mapang liasü.

Sentong tenzüka Tsüngrem

leniba meshia sarasadem, iba sülen Aor lokti lenırtemi arur ajak pela agizük. Iba sentong nung tongtipang shilemji sobaliba den sendakba sayuba, lokti saisapong liasü, koba ajanga asen Aor jangjayak aser sobaliba tushia amung.

Iba telongjem ajanga Aor lokti, talisa lanurtemi taso lima nungi pilar liaka, pei kin aser sobaliba kechi koda benshia arur aji jangja angu.

Tatem nung Tsüngrem tenüng sanga iba benjongmung tembang.

Department 16 indang AHODs aser HODs atema workshop ayongzük

Dimapur, Monupii/May 03 (TYO): Departments 16 nung AHODs aser HODs atema 'Institutionalizing Capacity Building: From Training to Performance Linked Governance' onük nung ajemdaker state level workshop ka P&AR aser Capacity Building Commission lungjemer May 2, 2026 nü ATI nung ayongzükba liasü.

Straining Council and Apex Training Committee aser training institutes aliba department tem ka kuma lungjema 'Unified Framework for role-focused & Performance Linked Capacity Building', 'Strengthening Training Institutions, Leveraging AI & Technology for Hyper- personalized Learning' aser 'Revisiting Cadre Training in States' amala

onük nung shisa agiteptsü nükjidong nung iba workshop ya ayongzükba liasü.

Item shisa ya State Recommendation Report nung ka kuma bendentsü, koba LBSNAA, Mussorie nung May 15-16, 2026 anogotem National Departmental Summit aliba mapang jembitsü, kong Minister of State (MOS), Ministry of Personnel, Government of India menden asütsü lir.

Iba workshop nung menden Weku Zhiemi, Under Secretary, P&AR menden liasü aser Additional Chief Secretary (Agriculture) and APC & Director General, ATI, V. Shashank Shekhar, IAS-i iba workshop ayongzükba nükjidong rateta ashi.

Pai iba sentong nung jembidang sorkar inyakyim ya mapa agi sayutsüla aser

nüburtem tiyong südaktsütsüla, ta ashi. Sorkar inyakyim ya jembishinü kangabo masütsüla aser mapa ang timba asütsüla, ta paisa shia liasü.

Iba sülen State Capacity Building Architecture indang osang tongmelang agi Livitoli Sukhalu, Deputy Secretary, P&AR ajanga lemsatep aser iba sülen la onir sür sensaksemba mapang liasü.

Iba mapang Capacity Building Commission (CBC), Government of India, Ranu Mukherjee, Advisor, CBC aser Maibam Warish, State Coordinator CBC (Meghalaya, Manipur and Nagaland) nati anir ketdangsur temi shilem agirtem den jembı.

Iba sentong nung Joint Director Kaholi den ATI nungi ketdangsur aser staff tem dena liasü.

Nagaland nung World Red Cross Day amungtsü

Kohima, Monupii/May 03 (TYO): Alima rangben nung taküm "United for Humanity" omen nung ajemdaker amungtsü aliba den lirumedema Nagaland nunga "Walk for Humanity" omen nung ajemdaker Indian Red Cross Society Nagaland (IRCSN) ajanga May 8, 2026 nü World Red Cross Day amungtsü renema lir.

Iba anogomung ya International Committee of the Red Cross tentetsang aser Nobel Peace Prize mezüng angusang Jean Henri Dunant sor küm 198 ajungba anogo nung amungtsü.

Swiss nunger shishilempar nungi nisung meimchir asoshi mapa tajung inyaker akumsang Dunant-i Battle of Solferino nung yiruba sepaitem timtemba ngua Red Cross movement ya tenzüka liasü. Pai ajangshibatem A Memory of Solferino kaket nung bendena aliba ajanga ICRC ya 1863 nung tenzüker aser alima ajunga nung humanitarian movement ka akum.

Red Cross volunteers temi rara, alimar lendong timtem mapang yaritepba atema tenüngsang agüja aliba tesem ajunga nung World Red Cross Day ya amunger.

Honibarnü osangbener senden ka nung jembidang, taküm iba omen yagi volunteers aser teyari angurtem ya statistics masü nisung meimchir lir ta nisungtem nem angatetdaksütsü nükjidong lir, ta IRCSN tongti zülur Akhale Khamo-i ashi.

Taoba küm tashi iba anogomung ya kilung nung munga aru, saka taküm Nagaland State Branch ajanga nüburtem timba nem ngudaktsütsü aser shilem timba agidaktsütsü mechi Walk for Humanity ayongzük, ta ashi.

Iba sentong ya anepdang 7:00 ako nung Red Cross Complex, Kohima nungi tenzüksü aser Old NST, Main Town area leni aotsü, ta Organising Committee convener Khyochano TCK-i ashi.

Iba sentong tatem nung local MLA Dr. Tsielhoutuo Rhutso-i

temang anema aliba onük nung ajemdaker jembitsü, ta lai ashi.

Iba sentong nung Junior and Youth Red Cross units nung affiliate süa aliba schools aser colleges, civil society organization aser lokti tentet balala nungi nisung 500 dak temai shilem agitsü parnoki imlaa aliba shisem.

Iba sentong nung Nagaland State Disaster Management Authority, Nagaland Voluntary Blood Donors Association, Kohima Village Youth Organisation, aser Kripa Foundation aser Family Planning Association of India ama NGOs temi yariteptsü.

Teintet rogotem, lanurtem aser temang shidak anepalua alitsü jangrartemi shilem agitsü teimla lir, koba ajanga nisung meimchir tenzüksü nung arishi küm telemsa mali ta sayur, ta ketdangsurtemi ashi.

Iba walk ya temaitsü ka kisüng masü, kechiaser iba ya Nagaland nung humanitarian awareness aser volunteerism tashi itshitsü atema campaign tuluba ka tetenzük, ta ashi.

"Nagaland nung Red Cross-i küm 30 dak tema tenzüka arur aser lendong timtem mapang aiben first responders ama inyaker. Saka nisung meimchir asoshi mapa tajung ya kisüngi meinyaktetsü. Asenoki lokti movement ka nungdaker," ta IRCSN Kohima Branch indang Joint Secretary Santu Thapa-ia ashi.

Iba sentong ya ajanga volunteers tasen shimtsü aser züngsem timba akumtsü, nüburtem Red Cross network nung adentsü ajungmesotsü, teyari agütsüba, blood donation drives aser emergency response nung shilem agidaktsütsü nükjidong nung ayongzük, ta IRCSN General Secretary Khamo-i ashi.

Alima rangben den külemi Nagaland nung Walk for Humanity ayongzüktsü renemshiba mapang ka nung yimjung, terenlok aser nisung meimchir akham tetushi atema nübur ajungai shilem agitsüba, temeim sayutsü aser telungjem alitsü ya tongtipangtiba lir ta sayur, ta Khamo-isa ashi.

Nagaland Angh State Bharat Scouts & Guides Chief Patron ama züngokogo



Dimapur, Monupii/May 3 (TYO): Nagaland Angh Nand Kishore Yadav, May 2 nü Nagaland State Bharat Scouts and Guides, Chief Patron ama züngokogo. Iba sentong ya Lok Bhavan, Kohima nung agia liasü.

Sentong nung o jembiba

mapang Angh-i, iba lokti tentet nung densemba atema kanga pelar aser iba ya tetushi tulu lir, kechiyong iba telok yagi küm aika lanurtem yimayimpong arangtetshitsüba aser lenir kaka akümtsü atema anitetba nung tongtibang shilem agia arudar, ta ashi.

Paisa, Chief Patron mapa agizükba ya khuret tulu aser lanurtem anitetsü atema bendanga agüja inyaksüba mapa ka lir, kechiyong lanurtem ta state aser linük tarutsü lir, ta ashi.

Bharat Scouts and Guides movement ya koda tongtibang iba indang lemsatepba mapang Angh-i, iba ya voluntary, non-political aser inclusive educational movement ka lir aser iba yagi kin kidong, shilu amala kecha bendanga mamshir, ta ashi.

Paisa, 1907 küm Lord Baden Powell-i iba lokti tentet ya tenzüksüba bilemtetshia jembı aser ashıba agı, iba lokti tentet temulungji discipline, tangar dak memetaloki aliba, tangar tenzüksüba aser lenisüba lir, koba tanü kanga

kara melenshia aoba lima ka nunga kanga tapet lir.

Angh-i, 1967 küm amenokba sülen Nagaland State Bharat Scouts and Guides tanem tanemi renlokyonga aoba tenüngsanga jembı aser ashıba agı, iba lokti tentet ya district balalai prokshıogo aser state nung aliba lanurtem taküm nung temelenshi bener arutsüdar.

Tanüa iba amala lokti tentet ya kanga tongtibang ta shıa pai, tetsüdaktsü aser minprong balala agı sünger aliba mapang iba movement yagi lanurtem dang len sayuba nung tongtibang shilem agir, ta ashi.

Paisa, Scouts and Guides tem dang ochishıba, temeim sayuba, tasü aıba aser anogoshıa inyakyim nung tangar

tenzüksüba amala yimyatem maneni ajungkettsü ajungshıba den, mapa tila ka dang süaka iba ajanga lokti nung temelenshi adokdaktsür, ta ashi.

Chief Patron ka ama pai takok tashi teyari agütsütsü nangzükba den, rıju aser ken o dak sendaka alirtem dang Nagaland nung iba movement ya akangshıtsü aser atsülanga aotsü asoshi teyari agütsütsü ayongzük.

Maneni Angh-i, Nagaland State Bharat Scouts and Guides nem parnok mapa tajung asoshi tenüngsang agütsü aser tarutsü nung temaba jenjang tongteta aotsü ta temulung lema bilemba lemsatep. Pai, ajak dang longjemer inyaksü ajungshıa liasü.



May 03, 2026 nü L&T Hazira nung Gujarat Deputy Chief Minister, Harsh Sanghavi-i Kaiga Unit 5 & 6 Nuclear Reactor Enshield semzüksüdang tangokba noksa nung angur.

Tanü state 4 aser UT ka nung assembly election votes azüngtsü

New Delhi, Monupii/May 03 (Agencies): West Bengal, Keralam, Tamil Nadu, Assam aser Union Territory of Puducherry nung assembly elections agiba votes Hombarnep 8:00 ako nungi azüngtsü atema election commission-i maparen ajak renemogo.

Assam nung assembly menden 126 atema votes ji district 35 nung aliba counting centres 40 nung azüngtsü. Assam nung tetsür 59 densema candidate ajak agi parnok 722 liasü.

Assam nung April 9 nü assembly election agia liasü.

West Bengal nunga state tesem balala nung counting centres 77 nung vote azüngtsü

atema maparen ajak renemogo, ta election commission-i metetdaksü.

Bengal nung shilem ana lemsar April 23 aser April 29 anogotem nung election agia liasü.

West Bengal Chief Electoral Officer Manoj Kumar Agarwal-i, "Election Commission-i magistrates, police, district officials aser Director General of Police den senden menogo. Ni nüburtem dang tensa meraksadaksütsü mepishir. Vote azüngba mapang nung merarateptsü. Election shilem ana lemsar agidanga rara madok, anungji asüng vote azüngdang-a rara madoktsü, ta ni amanger," ta metetdaksü.

Tamil Nadu nunga vote azüngtsü atema maparen ajak renemogo. Counting duty atema nisung 10, 545 lezmüksüogo aser micro-observers 4,624 lezmüksüogo. Tamil Nadu nung assembly constituency shia nung counting observers kaka alitsü.

Puducherry Union Territory nunga vote azüngtsü atema maparen ajak renemogo.

Puducherry Chief Electoral Officer P Jawahar-i, election commission-i shimtsüba observers-i ketdangsüa maparen ajakji teladak süa inyaktsü, ta metetdaksü.

Kerala nunga vote azüngtsü atema maparen ajak renemogo, ta election commission nungi ketdangsertemi metetdaksü.

Nisung tepsetba ken o nung Congress MLA ka anentsüogo

Bengaluru, May 03 (Agencies): Tamalen BJP lenir, Yogeshgouda Goudar tepsetba ken o dak sendakba nung Karnataka nung Congress MLA aser taoba mapang minister, Vinay Kulkarni state Legislative Assembly nungi anentsüogo.

Iba ken o nung pa aitsüba sülen pa assembly nungi anentsüba official sangdongji Honibarnü metetdakja liasü.

Kulkarni ya Dharwad constituency nungi liasü. Linük temzüng kübok Arrla 191(1)(e) aser Representation of the People Act, 1951 kübok Arrla 8 nung ajemdaker pa anentsüogo.

2016 küm BJP Zilla Panchayat züngsem, Yogeshgouda Goudar tepsetba ken o nung April 15, 2026 nü Bengaluru nung aliba special

court kati Kulkarni aija liasü.

Anogo ananü lir April 17 nü court-i Kulkarni den tangar nisung 15 taküm piyong tepuokdak ayutsü obendang agüja liasü.

2016 küm June 15 anogo nung nisung kari Goudar tsüngseta liasü. Iba mapang nungji Kulkarni ya state minister teinyakdak liasü.

Goudar'er kibong aser yimtenren lenirtemi akhangba nung ajemdaker iba ken o ya 2019 küm Central Bureau of Investigation (CBI) nem agütsü aser 2020 küm iba ken o nung Goudar tepsettsü atema asalentong yanglur tongtiji Kulkarni lir, ta tai tonglokja liasü.

2020 küm CBI-i Kulkarni apu saka 2021 küm August ita nung Supreme Court-i pa nem

bail agüja liasü, ajisüaka pa dang Dharwad district telungi maitsü tuyua liasü.

Ajisüaka yaküm June ita nung Supreme Court-i pai kuli raksatsütsü meranger, ta shia pa indang bail ji thinentsü. Ibaji anema pai temepishiba ken o ka agütsü saka taküm January ita nung High Court-i temepishibaji magizük.

Ano taküm February 27 nü Supreme Court-i pa nem bail agüja liasü. Iba ken o nung kulisürtem ajak ken o angadangogo, ta shia pa nem bail agüja liasü.

Pa assembly nungi anentsüba sülen tang Karnataka Assembly nung züngsem 224 dang kümogo, anungji kobi melii Dharwad menden atema by election agitsü.

Delhi kübok Vivek Vihar kiyong nung ki ka arong; nisung 9 asü

New Delhi, May 03 (Agencies): Amongnü anepdang züngia Delhi kübok Vivek Vihar kiyong nung ki ka arongba lendong nung nisung 9 rongsetogo, ta ketdangsertemi metetdaksü.

Anepdang 3:48 ako meta Vivek Vihar Phase-I nung pezüben amentepa asüba ki ka arong tenzükba sülen police, fire aser disaster management teams iba tesem jagi ao.

Police-i ashiba agi, ki tamentep tanabuba, tasembuba aser pezübuba nung mi tulu adoka liasü; tang tashi nungbo mi adokba kuliji mejangjar.

"Mi enseptsü merangba mapang nung nisung 15 shi kümzük. Nisung anabo yirua Guru Teg Bahadur Hospital-i anir ao," ta police ketdangser kati metetdaksü.

"Iba ya nisung aliba building liasü aser ki tamentep ajak atemaji lenmang ka dang liasü, kilem kolakji shibangadoker liasü. Nisung 9 süogo aser onoki nisung 15 shi kümzükogo. Parnok rongnung kabo mi agi mejungi ronger liasü, aser tang

paji GTB hospital-i anir oa treatment agidar," ta ketdangser kati metetdaksü.

Tang tashi nungbo mi adokba kuliji tejangja memetet, ajisüaka iba building nungji alir katibo, AC apokba ajanga mi adok asütsüa akok, ta ashi.

Miji enseptsü atema fire tenders 12 tashi amshia liasü saka ghonda aika agia dang miji ensepteta liasü. Iba denji külemi Delhi Disaster Management Authority (DDMA), traffic police aser police-i kümzükba maparen inyak.

Iba osang angashia Ato kilonser Narendra Modi-i takoksa angur kibongtem den mangyim tejashi lemsatepba den külemi asür kibong shia nem Prime Minister's National Relief Fund (PMNRF) nungi sen lakh anana aser yirua alir shia nem sen 50,000 agütsütsü sangdong.

Delhi Lieutenant Governor Taranjit Singh Sandhu aser Chief Minister, Rekha Gupta natia takoksa angurtem den tejashi lemsatepogo.



May 03, 2026 nü Kingston nung Jamaica Foreign Minister, Kamina J Smith-i Indian Union External Affairs Minister, S Jaishankar agizükdang tangokba noksa nung angur.

Election osang sangdongba sülen INDIA teloktep senden amentsü

New Delhi, May 03 (Agencies): State pezü aser Union territory ka nung assembly election agiba osang sangdongba sülen kobi melii opposition INDIA teloktep nung lenirtem senden ka amentsü, ta osang ka ajanga metetdaksü.

Delimitation aser women's reservation quota densema kanga tongtibang onüktem atema asalentong yanglutsü asoshi oppositon lenirtem senden amentsü.

Delimitation exercise kübok nütsüng sasep nung Parliamentary constituencies asetshitsü, ibayongji opposition party temi delimitation inyakyim anema longjemer nokdaksü asoshi iba senden nungji jembitsüa akok.

Iba dak alia opposition lenirtemi women's reservation atema o lemteptsü. Iba ozüng

kübok Lok Sabha aser state assemblies nung tetsürtem nem menden shilem 33 shiteta yutsütsü.

2029 küm Lok Sabha election matongdang women's reservation ya mapa küma benoktsü atema taoba ita Lok Sabha nung Constitution (131st Amendment) Bill benokba den Delimitation Bill aser Union Territories Laws (Amendment) Bill benoka liasü. Item bill atema o entepba sülen vote agütsütep saka sorkari two-thirds majority mengutetba agi iba bill magizükteti liasü.

INDIA teloktep senden nungjisa lenirtemi tawa election agiba osangtem asadangtsüa akok, party tem tsüngda taliba amalitepa inyaktsü atema jembitsü aser yimtenren dak sendakba asalentong balala yanglutsü, ta kasa osang ajangasa metetdaksü.



May 03, 2026 nü Srinagar nung temesepba mozü achiba ajanga temang raksatsüba awareness campaign 'Nasha Mukt Abhiyan' nung shilem agirtem noksa nung angur.



TIR YIMYIM YIMOBILEM (EDITORIAL)

DIMAPUR MONDAY, MAY (MONUPII) 04, 2026

Sobaliba benjong ya amungtsüla

Tanü putu tasenba nung asenok aikati sobaliba benjong Moatsü aser Tsüngremmung ama ya mamonger, kechiyong akhi ama asenok aikati tekong nung tsük lu mayimer, anungji akhi alu mapa dak sendakba sobaliba benjongtem amungtsü mapet akümer. Ano aji dang masü saka benjong amungba nung senotsü endokenra aser nübotsük aika lir, anungji sobaliba mangateter asoshibo benjong amongba ya amajok nung nübo aser rongsen lalushipongba sentong amai ka dang bilemer. Ano, aji dang masü saka tanübo asenoka tangar temeteter kintem oshioben meteta aküm nungji, asenoki asen soabaliba masü par temeteter sobaliba dang janrar aser asen sobaliba beshitsübaji mashimalu mapa ka amai bilemer. Ajisüaka, sobaliba benjong amongba ya chiyonga jema pelatepba dang masü saka yangji kin ka sobaliba otsü lir. Aji oda, benjong amongba nungji kin ka sübosülemtsü, kin ka oshi, kin ka kentenmenü, yar tsüngsang, külemküja, awashi aser temeim lemsatepba mapa tapu aika dena lir. Iba denji benjong amungba temoatsü kaji, benjong ajanga nisungtem pelatepa ajurutepdaksür aser tesentaktep akangshir. Atangji, tanübo asenok aika atema aluji tsük lu masü saka office nung inyakba mapa asütsüa akok mesüra mapa tapu balala nung ayangba aser business tapu balala inyakba mapatem asütsüa akok, anungji item mapatemji asen alu kümer asenoki sobaliba benjong ya asen putu dak apet tajungba-tajungba yanglushia mongra, iba jagi asen kin sobaliba tajungba meyushia beshitettsü. Asenok sobaliba benjongmung amungba nung ano tajung kaji, asenoki benjong mapang Tsüngrem tashi aser temeim bilemteter, anungji asenoki sobaliba benjong ya memungra, asenok aikati Tsüngrem melamelaa amadoktsü. Aji oda, talisa arogo nung junga shilem magiteter aser senteptsütepi aotsü mejangrar asoshi sobaliba benjong ya Tsüngrem tashi aser taochi bilemtetba mapang tajung ka asütsü. Sobaliba benjong yagi asen mapa nung temoatsü agütsürji Tsüngrem-a ta angatetdaksür, anungji asen tsürabur sobaliba ya Tsüngrem dak amangba sobaliba lir. Ibaji angateta tanübo asenoki asen sobaliba benjong Moatsü aser Tsüngremmung ya Khristantem benjong kümdaktsüra, atangji, iba jagi asen nübortem Tsüngrem anasai tali arutsü. Atangji, tanübo asenok ajak arogo nung dang asünungji, asen sobaliba benjong sentong ajak sarasademer tenzüker aser sarasademer atemer aser chiyongtsüa Yisu tenung nung meshiteta tenüngsang agütsür chiyonger, ajisüaka ano asenoki asen sobaliba benjong Moatsü aser Tsüngremmung ya tekülem ki telongibo bener meiteter lir, iba jagi tanü tashi asen sobaliba benjongtem ya asenok aikati Tsüngremi memulungba benjong amai bilemer. Iba jagi Moatsümung amungtsü jangrartem aikati senteptsütepi aotsü mejangrar. Iba ama mangatetba shisatsüji endoker, sobaliba benjong ya Tsüngrem külema pelatepa amungba benjong ta kodang asenoki agizüka mongtetdir, idangji asen kin oshi oben, sübosülemtsü, kentenmenü, yar tsüngsang aser temeim aer tepela lemsatepba awashi tajungba küma renloksü aser benjong ajanga asenok teputepba aser temeimtepba akümstsü. Iba denji külemi benjong amongtsü atema mapa nung temulung agütsü tenzüksü, kechiyong benjong amungtsü atema sen nungdaker aser senji mapa inyak nung dang angutsü. Atangji, tanü asenoki mapa meinyak ser asen sobaliba benjong amungba yabo sobaliba benjong masü, azümesener benjong lir, kechiyong küm piyong kecha meinyak kazür, mapang arudang benjong sentong yanglutsü aser benjong nung endokba senotsü menokteta tenla tulu agütsütsü imlaa tongti tesemdanger jaoktsü, anungji tanü asüng asenok sobaliba benjong amungba yabo asenoki inyakba agi mesüra asenoki agütsüba saru molok nungi amonger masü saka tangari agütsüba nungi amonger. Aji oda, tangari angati tenla agütsüba nungi benjong mongmonga asenok tali tali azümesenba kümogo. Ibaji asenok sobaliba masü. Iba azümesen sobaliba tamajungji toktsür, shitakba mapa inyaker amungba asen sobaliba benjong amung kodang tenzükdir, iba denji külemi asen lima nung yimjiyimjung tenzüksü.

OLEMSABANG

OCHISHIR TAKÜM

- Thriocy Stm, Mokokchung

Kima yimdong olatem nungi
parnoki narongjaker ka aküm.

Oli orar jendi watitepaka
khen danga meranglok,
kechi inyaker yangji par mulungjangi
bendanga ochi nung inyaker.

Tarendaktsü kecha maka,
tetsübu mali sadok-sadoka
wadang nung nokdaker.

Talila kodanga mebushi,
akoksaaka parnoki mesasar.
Pei tangutsütem noklemjia
khen khenbo mungui tembanger.

Reprangdangra par ki-o-jenji
koda tejen telaor ka,
saka parnoki sen sena mali.
Ochi mashi rongsen dak ranglok asübo
tanü tubur tajung Longro ki ka nung lila,
saka ochimashi rongsen dak
meranglok, tera dang süaka
ochiba rongsen jagi par nük sünger ali.

Ochi nung nokdakbayong
par tembar aika mali.
Rongsen angulen lenmangbo aika lir,
saka parnok asoshi item angadi
anguba rongsenji tenükshitsü ka masü.

Ochishia meranga inyaker
angubaji dang par asoshi senti
rongsen ta pela agizük.

Ochishir aser sensaker ka
asü nungji par nübuji aikadi mamshi.
Ochishir nübu kaji temetsüdaktsü
long ka ama bilem.
Par takümüji indang-indanger,
koba shitak
yangji akang akanga nokdak.

Ochishir taküm kaji kima
yimdong nunga aikadi majurunü,
kechiyong par ochiba sentsü
tewangwangji medizük.
Teti agia ochishir sülen anidakerbo
ishika dang alir.

Ochishir taküm kaji bener
arulen masü saka lema agütsür
rongnung aiben nokdaker.
Maka maityonga shisabulua mali
tejak tesangwa nung
menürema anogotem süidaktsür.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agütsü mepishir**

European Union nung Catholic putirtemi yimjung sangdonger



Nicosia, Cyprus nung ayongzükba Bishops' Conferences of European Union (COMECE) senden nung tangokba noksa nung angur.

May 03, 2026: European Union nung Catholic Arogo nung putirtemi alima nung lenirtem dang yimjung lenmang bushitsüla, aser alima tesem balala nung rara ajak anentsü atema inyaksüla, ta tayongzükba agütsü.

Nicosia, Cyprus nung ayongzükba Bishops' Conferences of the European Union (COMECE) senden nung tamalen Pope Leo XIV-i tayongzükba agütsüba lephsia metetdaksü.

"Raraba hadir bena alirtemi hadir yuadoktsüla! Raratsüsa tashi alirtemi yimjung

shimtsüla! Yimjungji kangshia masü saka ken o jembiba ajanga benoktsüla! Tanger amokbangtsü atema masü saka ajurutsü atema," ta parnoki metetdaksü.

EU Council nung Cyprus presidency agizüktsü atema Nicosia nung iba senden ayongzükba liasü. Putirtemi Cypriot deputy minister of culture, Vasiliki Kassianidou ajurua iba asetkong nung telemsa maneni adokba tebilemsü-a lemsatsep.

Cyprus semdangba maongka agia putirtemi EU dang iba asetkong nung

telemsa adoka aliba ya bentettsütsü atema inyakang ta ayongzük.

Putirtemisa Jerusalem nung aliba Khristanem atema tensa tamajungba akümba atema jembia. Latin Patriarch of Jerusalem, Cardinal Pierbattista Pizzaballa-ia video link ka ajanga temeshi lima nung Khristanem tia metetdaksü.

Tan hopta tetenzüklen Khristan lenir kati, temeshi lima nung lisopur Khristan nütsüng kanga ajema kümдар, aser iba region ya "Christian Disneyland" ka kümдар, ta metetdakja liasü.

London nung 'Jesus March' nung nisung aikati shilem agitsü

May 03, 2026: Pentecost hopta nung UK tesem balala nungi Khristan meyirjang aika London nung adenshia 'Jesus March' nung shilem agitsü.

Iba sentong ya May 23 nü nikongdang 2:00 ako nungi 5:00 ako tashi agitsü.

Ichthus Christian Fellowship-i Arogotem aser Khristan ministries aika den longjemer iba sentong ayongzükter.

Sentong ayongzükertemi ashiba agi, Jesus March ji Marble Arch nungi tenzüktsü aser Piccadilly adena aoba sülen Trafalgar Square nung tekülem sentong ka agia tembangtsü.

"Asen melungjang nung teimla, lenmangtem nung

tepela' omen nung ayongzükba sentong ya Yisu atema nüburtemi benjungtepba sentong ka asütsü.

Iba sentong ajanga London yimti tiyong nung Arogo balala, sobaliba balala aser tanur-tain tamangertem ajak longjemdaksütsü.

UK tesem balala nung nisung aikati Khristan yimsü tali metetnüba Arogotemi kuli agütsüba aser Khrista osangtajung lemsateptsü atema tejangraba aliba mapang ka nung Jesus March sentong ya agitsü, ta sentong ayongzükertemi metetdaksü.

Jesus March ya mezüng 1987 küm London nung tenzükba liasü aser tangbo iba ama sentong ya Europe aser

alima tesem balala nung agir.

Tawa item ama sentong ya Dublin, Belfast, Paris aser Amsterdam yimitem, iba denji külemi Germany, Spain aser Eastern Europe tesem aika nung agiogo.

Jesus March sentong ayongzükertemi, iba sentong nung yimtenren party tem wako mesüra linük wako khenyongi memelatsü, ajisüaka tanela nung Yisu nem tetushi agütsüba sentong ka asütsü, ta metetdaksü.

Sentong ayongzükertemi Arogotem aser nijatem dang iba sentong ya yimjak nung tamang sayuba aser telongjem sayuba sentong ka asütsü atema akokba tashi nisung aika ayongmesoang, ta mepishia metetdaksüogo.

Kenya nung Muslim nungertemi aluyimer Khristan tenet tepset

May 03, 2026: Tawa anüdoklen Kenya nung Khristanem timtem kanga ajangshia arudar; anüngdanga-a Khristanem tesünep nung meliteter, ta osang ka ajanga metetdaksü.

Khristan kati, "Anungdanga nai na aliba temeket reprangshia alitsüsa akümer. Tesem balala nung injang ola angashir," ta metetdaksü. April 25, 2026 nü Muslim

Somali nungertem Kitui county kübok Kwa Kamari-i aoba sülen aluyimer Khristan tenet khaset aser ki aika rongdoktsü.

Iba tesem nungji alir Khristan karbo jena otet, aser jena mouteterem khaset.

Khristan kati, "Mezüngbo tebur kari Arabic oshi jembiba ola angashia liasü, iba sülen injang ola aser nisungtem asatepba ola angashi. Iba tensaji mejangjai aika

ajentsüsa aküm," ta ashi.

Arogo nung lenir kati, "Takoksa anguba kibongtem onoki nungita yaridar. Kar khaset aser kar samaogo. Nüburtem tejashi nung lir," ta metetdaksü.

Khristan aluyimer kati, "Item nisungtem jagi onok kidang nungi aser alu nungi meindoker. Parnoki taochi makai tepseter," ta metetdaksü.

ANOGO ABEN TSÜNGREM DEN

Melangzüba Tasüngdangba

T. Ken 77:7-10

Langzüksüba dang nungi asüngdangtsüba temelaba. Item tekongtem nung tasü mait nisung kati tasüngdangbatem asüngdangba angur. "Kibubai teti asoshi ni sentokdi ma? Pa taochi teti asoshi oadokogo ma? Pai nangzükba joko amajok asü? Pai ain adoka pai taochi shibangogo ma?" (t.7-9). Aser tatem nung yamai ashi, "Ya ni tashi maitba; saka tematiba teka tajichilen aliba mapang ni bilemtet" (t.10).

Kodang asenok timtem ajanga odir asenoki yimya agi tasüngdangbatem asüngdangba. Dawid sarasadem, "Kü Tsüngrem, kü Tsüngrem, kechiba nai ni sentoker?" (T.Ken 22:1). Yisua kangki nungi iba o jembia (Matt. 27:46). Kodang asenoki timtem ajanga odir, asenoki Tsüngremi yaritsü aser kümzüktsü imlar. Aser kodang kümzüktsü atar asenoki maremsüker. Iba mapang nung tasüngdangba asüngdangba.

Tsüngrem dang ochi shia ashitsü tsübua teli. Pa dang ne tebilembatem shiang. Pai na anemsü mesüi ochi shia lidaktsüner. Saka ya bilemtetang: Khristan ama, asenoki rasaa ashiba nung masü; tenangzükbatem nung asenok alir. Tatishitsü agi, Tsüngremi iba tasüngdangba langzüksü tenzük. Kibubai teti asoshi sentoktsü asü? Masü. Pai ojang aochitsü asü? Atangji, Pai maongka sayutsü Pa taochi teti asoshi oatoker asü? Masü. Tsüngremi item tasüngdangbatem ajak langzürä balaka asütsü asü? Ne mulung tera süneptsü akok, saka tiajibo memelenshir. Tamang ajanga liang, tanguba agi masü. Kibuba tenangzükbatem nung amangang. Pai memelenshitsü.

Tsüngremi ne timtem nung tetibo ratetta mashitsü, saka Pai pa o tenangzükbatem agütsür. Na teimla makai tasü mait akümdang, sarasadem nung ne tasüngdangbatem Pa dangi bener arung, Pa o tenangzükbatem nung temulung leman. Tsüngremi ne nungdaktem metet aser itemji agütsütsü.

1976 NAGALAND REVIVAL

50 YEARS Jubilee

8th May 2026 11:00 AM

Mount Revival, Anaki Village

Revival ken

- Leader : Temsu Imsong
- Revival Choir : Tuli Lenten Baptist Arogo
- Invocation : A. Meren Pastor ABA
- Welcome : Asangla Luen
- Scripture : Menlong Noklang APBA

Tsukdokshir Tuli Lenten

- Tepela O : Nuken Deacon ABA
- Exhortation : Rev.Dr. Kari Longchar

The Witnesses/Anaki Yimsen Choir

- Thanksgiving : Dr. Chujang Aier, President IEF
- Message : Rev. Temsu Jamir, Executive Secretary, ABAM
- Thanksgiving & Worship : Sinai Music Dimapur

Lunch

Iba sentong nung tejangrar ajak arua adentsü pelashishia jaoker.

AO OSHI ANGAZÜKDAK:

TANÜ ANGAZÜKTSÜBA OJANG



Yanglu

(v) inyaka renem (create, make)

* Tsüngremi alima yanglu.

Yanglulok

(adv) tuluba aser talangba yanglusem (extended)

* Ozü kidang takdang ka yanglulok.

OLONG PAITEP # 7493

Grid for crossword puzzle #7493 with numbers 1-17.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S ___ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputup - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 7492 TELANGZÜBA


TIPIEN :

- 1. Telok, 4. Aluru, 6. Ozüng, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kiochtsü,
5. Lenti, 7. Tajangzük, 11. Teronem,
12. Sempa, 13. Jahaz.

NAI-A YA METETTER



Missing Link Tunnel Now Open To Public!

May 1, 2026 nü Maharashtra Day nung Chief Minister Devendra Fadnavis-i Mumbai-Pune Expressway nung Missing Link project lapoktsüogo. Kasa mapang CM Fadnavis nem 'world's widest underground tunnel' atema Guinness Book of World Records kulikaket agütsü.

Kilometer 8.92 talang tunnel ya Missing Link project nung shilem ka lir aser iba ajanga ghat section nung aliba lenmangtem melena tanga lenmang ka agütsür. Iba tunnel indang 23 metre width atema world record angur.

NITI Aayog nung Arunachal Dr Joram Aniya shim



Itanagar, May 3, 2026 (Agencies): Centre sorkari May 2, 2026 nü NITI Aayog nung full-time member asütsü atema Arunachal Pradesh nungi Dr Joram Aniya shimogo.

NITI Aayog nung academician Dr Aniya shimokba ya Arunachal Pradesh aser Northeast ajunga atema konang ka lir.

Dr Aniya shimokba ya

Arunachal Pradesh nungi shisashir ola ka ajungketa linük nung policymaking tematiba jenjang nung mendaktsüba ama züngshir.

Academician aser Associate Professor, Dr Aniya ya Arunachal Pradesh Private Educational Regulatory Commission nung züngsem ka lir. Lai küm 18 tema teaching, research aser public policy

engagement maparen inyaka arur.

La ya Nyishi tetsürtem rongnungi PhD angur mezüngbuba aser ano Arunachal Pradesh nungi Hindi language studies nung mezüngbuba doctorate angur lir.

Dr Aniya-i Nyishi kaketken o aser sobaliba indang kaket aika zülüogo aser iba dak alia academic research papers aika adokogo.

Prime Minister Narendra Modi-i Honibarnü Dr R Balasubramaniam aser Dr Joram Aniya na NITI Aayog nung full-time members ama shimba osang metetdaksü.

"Dr. R. Balasubramaniam aser Dr. Joram Aniya na NITI Aayog nung Full-time Members ama shimba asoshi tenüngsang agütsür. Tenati aika ajangshia aruba aser onük aika kanga junga angateta aliba ajanga policy making tashi aittsü" ta PM Modi-i ashi.

Congress-i Mizoram nung talent hunt programme tenzükogo

Aizawl, May 3, 2026 (Agencies): Mizoram nung Indian National Congress-i May 1 nungi talent hunt programme ka tenzükogo.

Iba ya political communicators aser grassroots leaders atema lanuputu tasen ka anitetsü atema lir.

Congress national spokesperson Ritu

Choudhary-i Aizawl nung osangbener senden ka nung jembidang iba mapa ajanga spokespersons, research coordinators, aser publicity coordinators anitetsü atema temulung agütsütsü ta ashi.

Iba mapa ya democratic dialogue, public outreach aser young political voices tashi itdaksütsü atema lir ta Ritu

Choudhary-isa metetdaksü.

Indian National Congress-i yaküm linük ajungalen "National Talent Hunt" programme tenzükba nung iba ya shilem ka lir.

INC-i linük ajungalen media panellists, communicators aser organisational leaders anitetsü aser tashi itdaksütsü asoshi iba mapa inyaker.

Assam nung Longtong Sema Naga village-i terenlok aginür

Guwahati, May 3, 2026 (Agencies): Tinsukia district kübok Longtong Sema Naga Village-i Centre aser state sorkartem dang senotsü teyari meshiogo.

Iba yimtsüng ya 83rd Margherita Legislative Assembly Constituency nung Khumchai Gaon Panchayat kübok lir.

Longtong Sema Naga Village ya British yimsüsüba mapang 1904 nung aküm. Sema Naga nungertem iba tesemi political labour corps ama anir aruba sülen yimtsüng aküm. Parnoki Namdang coalfields nung nakmati atu, Digboi nung totzü bushi aser otsüsütsü aketba Ledo Road (Stilwell Road) yangluba nung shilem agia liasü.

Iba yimtsüng nung nütsüng

yongsük 4,000 tema lir aser parnok teimbaka aluyimba nung dak metaloka lir. Senmang aliba yimtsüng ka aser iba tesem putiotsü nung shilem agiaka tang tashi terenlok mali.

"Ozü oboula nungeri iba tesem atema bendanga agütsü ajisüaka nübertem senzüka yutsür aser bendanga amshir" ta All Assam Sema Naga Council nung chairman Kahoto Sema-i ashi.

Paisa lenmang majungba, drinking water facilities maliba, healthcare infrastructure maliba aser Sema Naga kaketshirtem asoshi higher education peria maliba indang tebilemstü metetdaksü.

"Külen, World War II nung taküm bendanga agütsüba sepaitem tushiba Longtong

Chinese Cemetery senzüka yutsür. Ketdangpurtemi iba tesem anepalu masür" ta Kahoto Sema-isa ashi.

2003 nung taoba India President A. P. J. Abdul Kalam-i Longtong Sema Naga Village semdang aser nüngshilung ka sayatsü. Kümtem süia arudang chief minister tem, minister tem, MP tem, ketdangsurtem, film nisungtem aser nature enthusiasts aikati yimtsüng semdangogo saka tang tashi terenlok mali ta paisa ashi.

May 4, 2026 nü Assam Assembly election results sangdongba sülen taruba sorkari Longtong Sema Naga Village nung infrastructure development aser heritage conservation nung temulung agütsütsü imlar.



Guwahati nung May 01,2026 anogo nung Aotsür Aortem Moatsü amungba noksa kar yangi angur.

Israel-i southern Lebanon nung totuyuba tasen agütsür

Beirut, Monupii/May 03 (Agencies): Lebanon nung telungpur telok, Hezbollah den rara anentsü atema tezüngzüktep ka yanglua liaka Israel mitkari southern Lebanon nung tang par kübok aliba tesemtem alema oa jila aser yimtsüngtem nung alirtem ainshitsü totuyuba agütsüogo.

"Nenok takum jenbutsü atema nenok tangsa ner kidang nungi ainshitsütsüla aser nenok aliba yimtsüngtem aser jila tem nungi metres 1,000 shi pilar moapu bushia aotsüla," ta Israel mitkar indang Arabic oshi odongtar Avichay Adraee-i Deobarnü X post ka nung ashi.

Iba tekumdangtsü yagi Litani River north tsütsü aliba Nabatieh district nung tesem balala densema yimtsüng aser jila ter dak tema ayimjemer, aser iba ayong south tsütsü Israel sepaitem lir.

Mapang tatsüka lir Lebanon sorkar meyong National News Agency ajanga Israel nungeri iba 'displacement order' nung shia maliba jila tem densema southern Lebanon tesem ajungalen amak ta ashi.

April 17 nungi United States

tetsüngtai ia tashi mait ceasefire ka Israel aser Lebanon tsüngta sangdong, koba Hezbollah aser Israel mitkar tsüngta azüdokshi anendaktsütsü nükjidong nung liasü.

Bodhbarnü Israel military chief of staff, Eyal Zamir-i "Yellow Line" alema oa Hezbollah amaktsü amokmerena liasü, koba Israel kübok aliba tesemtem lir.

"Yellow Line aser Litani north tsütsü densema kong südir süaka ozü nisung mesüra ozü sepaitem anema kechi komala timtem agütsüdir agüjaka, onoki samatsütsü," ta pai Israel sepaitem semdangba mapang ka ashi.

Taoba hopta iba tesem nung drone amshia amakdang sepa ana aser army contractor a tepset aser sepa aika yirua liasü.

US-i Lebanon aser Israel tsüngta indang-indanga yimjung ken o jembishinütsü ajungshir, saka Lebanon Tir Joseph Aoun-i jembishinü metenzükdang Israel-i ceasefire nung aliba ama ajak shidak inyaktsüla, ta

Bodhbarnü shia liasü.

Hokulbarnü Israel-i tayimtsü amshia southern Lebanon amakdang tetsür pezü aser tanur ka densema nisung 13 asü, ta Lebanese health ministry ajanga ashi.

Nabatieh district nung aliba Haboush nung nisung ti tepsetba nung tetsür ana aser tanur ka liasü, kong Israel Defense Forces (IDF) ajanga nüburtem dang ainshitsü totuyuba agüja lir.

Sidon district kübok Zrariah nung tetsür ana aser tebur ana tepset aser Tyre district kübok Ain Baal nunga nisung ka tepset. Hokulbarnü yirur ajak agi nisung 32 liasü.

Iran-i yariba Hezbollah telokia Lebanon nung Israel sepaitem aser sepa indang garitem amak, ta Honibarnü shia liasü.

March ita tetenzüklen nungi southern Lebanon nung Israel mitkar asüba 17 jungogo ta ashir. Honibarnü Lebanon indang Ministry of Public Health-i ashiba agi, March 2 nü Israel-Hezbollah rara tenzüker nisung asüba ajak agi 2,659 aser yiruba 8,183 lir.

Ukraine-i drone amshia Primorsk port amak

Moscow, Monupii/May 3 (Agencies): Ukraine-i Deobarnü drone amshia Baltic tzüyim nung Russia indang Primorsk port amakba sülen iba tesem nung mi adoka liasü, ta local governor Alexander Drozdenko-i Telegram messaging app ajanga metetdaksü.

Ukraine-i asendenshir Russia kübok tesem balala amakba mapang tang iba tesem ya makogo.

Drozdenko-i ashiba agi, manger mesangwa tsüngda Russia kübok Leningrad tesem nung drone 60 dak tema khazüka yokogo. Primorsk amakba sülen totzü yimshibabo kecha mali aser iba tesem nung mi adokbabo temsepogo, ta pai shisem. Iba tesem ya totzü export asüba tongtibatang tesem ka lir.

Primorsk ya Russia asoshi totzü export asüba tesem tulutiba rongnung ka lir, kong anogo nung totzü barrel million 1 supply asüba achaayanger. Ukraine-i asendenshir Russia indang energy infrastructure aser tanga tesemtem amakba mapang ita ishika tsüngda iba tesem ya aiben maka arudar.

Ukraine nunger sepaitemisa Black Sea nung Russia indang Novorossiysk port kikümtong nung tzüyim nung shadow fleet tanker ana

makogo, ta Ukraine tir Volodymyr Zelenskiy-i Honibarnü metetdaksü.

"Item rongtem ya totzü shibelenba nung amshia aruogo saka joko ojang dang amshitsü," ta Zelenskiy-i Telegram ajanga ashi. "Ukraine indang long-range capabilities ya tzüyim, anüng aser ali nung maneni renlokyonga aotsü," ta paisa shisem.

Honibar aser Deobarnü ano drone amshia Russia kübok tesem balala makogo.

Moscow regional governor Andrei Vorobyov-i Honibarnü nikongtsütsü ashiba agi, drone agi yimtsüng ka amakba sülen arishi küm 77 tain tebur ka tepsetogo. Maneni Moscow yimti mayor Sergei Sobyannin-ia, Russia yimtiba amaktsü atema yokba drone pezü khadangogo, ta ashi.

Anüolen aliba Smolensk tesem governor Vasily Anokhin-i ashiba agi, tanur ka densema nisung asem Deobarnü drone agi apartment block ka amakba sülen yiruogo.

Kasa mapang nung Russia nunger sepaitem Ukraine kübok Ukraine's tesem nung Kostiantynivka yimti tonga odar, ta Ukraine nunger army ketdangsurtemi Honibarnü metetdaksü.

Sri Lanka cyber fraud ken o nung bendanger 130 dak tema puogo

Colombo, Monupii/May 3 (Agencies): Taoba anogo ana tsüngda Sri Lanka nung cybercrime operations dak sendakba nung bendanger 130 dak tema puogo, ta police-i metetdaksü.

Sri Lanka nung amendaker bendanglen online ajanga tangar ashiochtsüba mapa inyaktertem puyonga aotsü atema police-i jenjang agiba nung iba ya-a shilem ka lir.

Honibarnü Colombo tezülén Thalangama tesem meita aoba mapang police-i China nunger 37 apu.

Parnok rongnung tetsür ka, visa shita maliba nisung ana aser

passport dena maliba nisung ka densema liasü, ta police-i ashi.

Parnok ajak ya arishi küm 24 nungi 44 tsüngda liasü.

Deobarnü ano meita aoba mapang Colombo tezülensa Rajagiriya tesem nung nisung 100 dak tema puogo.

Tanabenbuba meita aoba mapang apurtem rongnung China, Vietnam, Malaysia, Madagascar, the Philippines, Thailand aser Cambodia nungertem densema liasü.

Parnoki ya taah agütsür amshiba apartment ka nungi inyakshangshia liasü, ta police-i ashi.

Police-i pua alirtem ya

cybercrime, hacking aser data mashiyimi amshiba anema benokba Sri Lanka indang ozüing tesashitiba Computer Crimes Act kübok aitsüogo.

Ita ishika tsüngda ibala mesükba meita aoba sentong benoka inyakba sülen tang item nisungtem puogo, ta police-isa shisem.

April ita police-i bendanger 150 shi apu. Parnok ya timba China nunger liasü. Parnok ya Chilaw yimti nung amendaker online ajanga senotsü ochi meshi-i amshiba nung sendaka liasü.

Küma ka tsüngda iba amala mesükba telok aika puogo.

Iran-i US nem yimjung atema taginüba onük 14 agütsü

Tehran, Monupii/May 03 (Agencies): West Asia nung rara tatem kati arutsü atema Donald Trump indang administration-i point toku framework proposal agütsüba nung langzüa Iran-ia Pakistan ajanga United States of America nem yimjung atema taginüba onük tasen 14 agütsüogo.

Iran-i akhangba nung US-i Lebanon densema tesem ajungalen rara tatem kati arutsüla, tzüyim mokdanga aliba agentsüla, sepaitem ainshitsü aser Strait of Hormuz atema governing mechanism tasen ka amenoktsü dena lir ta Iranian media outlets temi ashir.

Iba strait ya ajanga alima nung amshiba totzü shilem 20 aser LNG shilem 20 abener.

Iran indang 14-point plan nungya Iran nem sanction agüja aliba agentsü, Iran nunger rongsen soita aliba salatsü aser compensation dena lir.

Washington indang ita ana ceasefire sentong nung langzüa Iran-i anogo 30 tsüngta ken o ajunga angatetteptsü meranger.

Iran indang deputy foreign minister Kazem Gharibabadi-i, tangatettep kati arutsüsa jembishinü lenmang bushitsü mesüra rara dangi meyiptsü US dak keta lir, aser Tehran

anaprong atema renema lir, ta ashi.

"Tangatettep lenmang shimtsü mesüra maneni raratsü United States dak keta lir. Linük tejangraba aser security alitsü nükjidong nung Iran-bo lenmang anaprong atema renema lir," ta Gharibabadi-i Tehran nung diplomats tem dang ashi.

Tir Trump-i Iran indang tesüsaba 14-point proposal reprangba mapang lir ta ashi aser kasa mapang ano US-i asendenshir amaktsü ama ashir.

"Iran dak sendakba nung onok kanga junga inyaktar. Parnoki tezüngzüktep ka yangluner... Parnoki par lenir mejangjateter... Ni yangji reprangtar... Parnoki iba tezüngzüktep indang tangatetba shiogo. Parnoki künem tejangja ojang agütsütsü," ta pai ashi.

Aji masüdang Trump-i pa indang Truth Social sapang nung Iran indang proposal nung temulung machiba lemsatepa liasü.

"Iran-i dang onok dangi yokba sentong ni yakta reprangshitsü, saka tesüiba küm 47 dak tema parnoki nisung meimchir aser alima dang inyakba taa teperi magütsü yur aji agizüktsü nibo meimlar," ta Trump-i Truth Social nung ashi.



Yangon, May 3: Myanmar yimtiba Nay Pyi Taw nung gari lendong ka atalokdak tangokba noksa nung angur. Honibarnü süngkum bena aliba gari tuluka makepokba lendong nung nisung 16 asü aser 21 yiru, ta Myanmar Fire Services Department ajanga ashi.

PL: Arsenal pur City dang nungi point 6 agi timba kümogo



Monupii/May 3, 2026

(Agencies): Arsenal pur Premier League abentsü atema meranga asayaba mapang Fulham pur goal 3-0 agi akokba sülen parnok jenjang junga kümogo aser tanabuba jenjang nung aliba team dang nungi point trok agi timba kümogo.

Asayamung akoktsü atema toktepa asayaba mapang kanga dang tongtibang mapang ka nung asaya ka ana nung tamakok ngua jenjang mejungi akümba sülen Mikel Arteta-i aniba team asoshi iba asaya akokba ya kanga dang tongtibang lir.

Bukayo Saka yirur aliba meyipa aruru hopta trok

tsüingda tang mezüingbuba tetenzük nungi asayaba ajanga Arsenal nem tashi tali agütsüba den asaya azioka asayatsü asoshi teyari agütsüdar.

Asaya nung mezüingbuba goal ya minute tekububa nung Saka-i agütsüba balala ka Viktor Gyokeres-i idaktsü. Iba sülen mapang tatsüka dang lir Gyokeres-i meyiper Saka nem ball tajung ka agüja tanabuba idaktsü.

Iba sülen asaya mezüingbuba shilem metembang tsüingda Gyokeres-i team asoshi tasembuba aser pa atema tanabuba goal idaktsü. Iba goal ya pa asoshi Arsenal nungi mezüingbuba season asayaba mapang goal 21buba idaktsüba liasü.

Atletico Madrid den Champions League semi-final tanabuba leg asayatsü lia Arteta-i tongtibang asayatem asaya tatem anisüingzükdakja liasü.

Kasa mapang nung West Ham United puri Brentford

goal 3-0 agi makokba sülen Tottenham Hotspur pur relegate asütsü ana nung aliba mapang teyari agütsüogo.

Iba asaya result ajanga Spurs pur Aston Villa den tongtibang asaya ka masaya tsüingda relegate mesüi jembotsü atema point ana dang nüngdaka kümogo.

Maneni Brentford pur top-six nung season tembangtsü atema jenjang junga kümogo. Igor Thiago-i penalty ka ajanga goal ka idaktsü aser Mikkel Damsgaard-i tasembuba goal idakja parnoki asaya akok.

Newcastle United pura asaya pongu tashi khen danga takok mongui asaya aliba Brighton & Hove Albion pur 3-1 agi koka relegate asütsü asoshi lendongbang nung aliba nungi jenbogo.

Sunderland pur European qualification atema tanga kanga meranga asayaba mapang ka lir, saka Wolverhampton Wanderers pur den goal 1-1 agütsür tembangba ajanga tetsüdaktsü ajangshiogo.

IPL 2026: Sunil Narine-i alizüing tasen ka tongtetogo



Monupii/May 3, 2026

(Agencies): Indian Premier League nung Deobarnü Kolkata Knight Riders-i Sunrisers Hyderabad wicket tenet agi koka SRH pur asaya pongu tashi khen danga tamakok mongui asaya aliba tembangdaktsüogo.

Asaya nung Varun Chakravarthy-i wicket 3 aser Sunil Narine-i wicket 2 agia SRH pur nem over 19 nung asayar ajak out ser run 165 dang yangludaktsüba nung teyari agüja liasü. KKR puri ball 10 anunga lia iba asaya koka parnoki asaya asemububa atonga kokogo.

Chakravarthy-i asaya pezübuba atonga wicket anabosa agiogo. Kasa mapang nung Narine-i alizüing tasen ka tongteta pa IPL nung 200-wicket club-i iogo. Asaya 197buba asayaba mapang Narine ya iba club nung Bhuvneshwar Kumar (215 wickets; asaya 199) aser Yuzvendra Chahal (228 wickets; asaya 182) na den denogo.

Asaya akoktsü atema run 166 nüngdaka asayaba mapang Finn Allen (run 39) over pezübuba nung out süatok. Iba sülen Captain Ajinkya Rahane (run 43) aser Angkrish Raghuvanshi (run 59) nati team jenjang yanglushitsü. Tena senteper over 11buba tashi nung run 84 yanglu.

Rahane-i four pezü aser six ka aziük aser Raghuvanshi-ia four pongu aser six ana züka liasü. Asaya ya Rinku Singh-i four ka züker tembang, shibai ball 11 nung out mesüi run 22 yanglua liasü.

SHR pur batting amenba mapang powerplay sülen parnoki asayar 1 out ser run 77 yanglur liasü aser asayar ana out asüba mapang tashi nung run 107 liasü. Travis Head-i ball 28 nung run 61 aser Ishan Kishan-i ball 29 nung run 42 yanglu.

Iba sülen SRH pur batter tem kanga kara out süatok aser tatembangbuba over 10 nung parnoki run 60 dang yanglutet.

East Bengal coach Oscar Bruzon-i club toktsütsü



Oscar Bruzon

Kashi nunger den asayatsü lir. Inter Kashi den tatembangbuba asaya atema anogo mejangjai lir.

East Bengal pur asaya teku asayaogo aser parnoki temaba jenjang nung aliba Jamshedpur (asaya 11 nungi point 21) point asem agi memenepe lir. Parnok asaya ana agi tajemba asayar lir asünung asayamung akoktsü atema timla lir.

"Iba telemtetba ya rongsenketzüing dak sendaka mali aser jurila telemtetba ka lir. Iba ya India nung football asaya jenjang mejangjai aliba dak sendaka mali. Iba ya club management dak sendaka lir," ta Bruzon-i ashi.

Spain nunger coach yagi, tarutsü atema sentong junga yanglua maliba aser tarutsü mejangjaba ajanga club toktsür ta ashi.

"2025 küm February ita nungi onoki iba season atema sentong yanglu tenzük. Ni technical ken o nung densema inyaka aruogo aser Vibhash Agarwal-i rongsenketzüing achaayanga liasü," ta Bruzon-i ashi.

"Tang May tongogo, saka tarutsü atema mapang talangka asoshi sentong mali aser team nung tongtibang asayatem ayutsü asoshi sensaksem kecha mali. East Bengal tarutsü atema kecha sentong mali," ta Bruzon-i ashi.

Monupii/May 3, 2026

(Agencies): East Bengal coach Oscar Bruzon-i season tembangba sülen club toktsütsü ta metetdaktsüogo.

Club tarutsü atema sentong shitak maliba aser tarutsü mejangjaba ajanga pai iba telemtetba agi, ta Bruzon-i ashi, koba küm noklang dak tema tain iba club asoshi maksü ka lir.

Bruzon asoshi May 31 nü ya East Bengal nung tatembangbuba anogo asütsü.

"Tang asaya aliba ISL asaya nung onok asaya pezü asayatsü anunga lir. Ni asaya

pezü ya asayaba sülenbo club toktsütsü. May 31 nü ya East Bengal coach ama ni asoshi tatembangbuba anogo asütsü," ta Mumbai City FC den asayatsü anogo ana lir Bruzon-i ashi.

ISL nung kanga dang tongtibang mapang ka nung tang iba ya atalokogo. East Bengal pur mezüingbuba ISL akoktsü atema timla mesamai lir.

East Bengal pur tanungba asaya pezü ya Mumbai City (Mongolbar), Punjab (May 11), Mohun Bagan Super Giant (May 17) aser Inter

Thomas Cup: France-i India tsükdaktsüogo

Monupii/May 3, 2026

(Agencies): Thomas Cup group stage nung iba asayamung 14ben koker aliba Indonesia team tsükdaktsüba France team-i semifinal nung 2022 champions India team 3-0 agi kokogo.

Christo Popov-i 21-11, 21-9 agi Ayush Shetty koka parnok tejakdang aküm. Iba sülen Alex Lanier-ia Kidambi Srikanth 21-18, 21-16 agi straight-game nung koka parnok 2-0 agi tejakdang aküm. India asoshi asaya akoktsü kanga dang nüngdaka asayaba kija asaya ka nung HS Prannoy-i asaya junga tenzük saka 19-21, 16-21 agi Toma Junior Popov mekoki parnok asayamung nungi tuguogo.

Popov aser Ayush na asaya ya Popov-i amokbanger asaya aser pai asaya minute 39 nung dang kokatok. Reigning World Tour Finals champion yagi net nung asaya amokbanger asaya aser Ayush indang backhand corner nung smash majen ma-a asaya aser asaya azioka liasü.

Ayushi shiba Deobarnü

arishi küm 21 jungogo, pai Christo ya pa asoshi jungrara liasü, ta ashi. "Tanü ni asayaba yimya dak kanga tezü adanger. Christo-i tanü kanga junga asayaogo. Pa indang pace kanga takara liasü aser ni kanga nongshia asaya. Pai kanga sangra asaya aser tanü kü danga nungi kanga agi tajungba asayaogo," ta Ayush-i ashi.

Semifinal asaya metenzükdang yongi India team jenjang mejungi kümer liasü, kechiyong Lakshya Sen teka tachichilen tekatsüla yiruba ajanga masayatetsüsa aküm.

"Quarterfinal nung aiben dive süa asayaba sülen Lakshya tekatsüla yirua liasü. Team indang medical staff-i pa teka kanga junga asadanga sülen India team final tongra iba asaya nungang pa asayadaktsütsü asoshi telemtetba agia liasü," ta BAI general secretary Sanjay Mishra-i ashi.

Kasa mapang nung Korea aser China na Uber Cup final asayatsü. Semifinal nung South Korea-i 3-1 agi Indonesia akok aser China-i 3-0 agi Japan kokogo.

BILEMDANGANG

"Yimya tajung tamajung ajak nü mulung nungi adoker."